



Nefndarsvið Alþingis
Austurstræti 8-12

150 REYKJAVÍK

Reykjavík 22. nóvember 2010

Efni: Umsögn um tillögu til þingsályktunar um samvinnuráð um þjóðarsátt, 80. mál.

Efnahags- og skattanefnd hefur sent Samtökum atvinnulífsins til umsagnar ofangreinda tillögu til þingsályktunar, sbr. þingskjal 84. Samkvæmt tillögunni er forsætisráðherra falið að koma á fót samvinnuráði, vettvangi stjórnmalaflokka og hagsmunaaðila, til að ræða og leita leiða í anda þjóðarsáttar til langtímastyrkingar atvinnuvega landsins og efnahags þjóðarinnar til frambúðar.

Samtök atvinnulífsins taka undir mikilvægi samstöðu og samstarfs við úrlausn mikilvægra og flókinnna mála sem snerta þjóðarhag. Á grundvelli þessa tóku samtökin heilshugar þátt í stöðugleikasáttmála ríkisstjórnar, samtaka sveitarfélaga og aðila vinnumarkaðarins sem undirritaður var 25. júní 2009 og var ætlað að skapa skilyrði fyrir sóknarfærum í atvinnulífmu, nýjum fjárfestingum, auknum umsvifum, fjölgun starfa, minna atvinnuleysi og meiri verðmætasköpun. Í sáttmálanum voru ákveðin viðmið um lækkun vaxta, endurreisn bankakerfisins og afnám gjaldeyrishafta í áföngum. Ennfremur voru í sáttmálanum áform um að greiða fyrir tilteknum framkvæmdum og fjárfestingum og leiðir að fjármögnun þeirra.

Því miður urðu efndir stjórnvalda á þeirra hlut sáttmálans minni en ásætlanlegt var. Stjórn SA samþykkti 22. mars 2010 að segja sig frá stöðugleikasáttmálanum, enda hefði ríkisstjórnin bæði með aðgerðum sínum og aðgerðaleyfi á þeim níu mánuðum sem liðin voru frá undirritun stöðugleikasáttmálans vísað SA frá sáttmálanum. Á þeim átta mánuðum sem síðan hafa liðið hefur komið enn skýrar fram getuleysi ríkisstjórnarinnar við að greiða úr og leysa úr málum sem að henna snýr og er forsenda eðlilegra starfsskilyrða fyrirtækja í landinu.

SA hafa ítrekað lýst yfir vilja til samstarfs við aðra aðila á vinnumarkaðnum og ríkisstjórnina um að snúa af braut stöðunar og atvinnuleysis og hefja sókn í atvinnulífmu og skapa ný störf til að endurheimta á næstu árum lífsjör fólks. Að mati SA liggur fyrir hver eru brýnustu sameiginlegu úrlausnarefni þjóðarinnar til að endurheimta á næstu árum lífskjör fólks. Auk þeirra markmiða sem tilgreind eru í tillögunni sem hér er til umfjöllunar þá er sérstaklega mikilvægt að tryggja eðlilegt fjárflæði milli Íslands og annarra landa með opnum aðgangi að erlendu lánsfé, fjárfestingum og nýrri uppbyggingu í útflutningsgreinum. Það tryggir að gengi íslensku krónunnar geti hækkað á nýjan leik og nálgast jafnvægisgengi sem er lykilatriði til þess að ná niður verðhækkunum, bæta lífskjör og koma starfsemi fyrirtækja í ásætlanlegt horf.

Ónógar fjárfestingar eru lykilástæðan fyrir þeirri metnaðarlitlu framtíðarsýn sem kemur fram í spám um takmarkaðan hagvöxt á næstu árum. Fjárfestingar á Íslandi eru of litlar til að viðhalda samkeppnishæfni atvinnulífsins og tryggja störf til lengri tíma. Fjárfestingar, fyrst og fremst í



SAMTÖK ATVINNULÍFSINS

útflutningsgreinum, skapa bæði varanleg störf og störf til skemmri tíma. Þær tryggja auknar útflutningstekjur, styrkari gjaldmiðil og bætt lífskjör til lengri tíma.

Á næstu vikum verða kjarasamningar flestra stéttarfélaga lausir. Starf Samtaka atvinnulífsins á næstu mánuðum miðast við að gera kjarasamninga sem skapi skilyrði til að atvinnulífið komist upp úr kreppunni og nái fyrri styrk. SA hafa hvatt alla aðila vinnumarkaðarins um að sameinast um gerð kjarasamninga til a.m.k. þriggja ára sem leiði til sambærilegra og hóflegra launahækkana til að skapa grundvöll fyrir stöðugleika í launamálum og vinnufrið. Þá þurfa ríkisstjórn og Alþingi að skapa skilyrði sem hvetja fyrirtæki til fjárfestinga og nýráðninga. Saman þurfa því allir ábyrgir aðilar að leggja sitt af mörkum þannig að árangur náist.

Samtökin vilja því viðtækt samstarf um að virkja þann kraft sem býr í íslenskum fyrirtækjum, kraftinn sem getur skilað okkur upp úr kreppunni og fært okkur aftur störf og lífskjör sem glatast hafa.

Virðingarfyllst,

f.h. Samtaka atvinnulífsins

